

## Shartnoma № \_\_\_\_\_

“ \_\_\_\_\_ ” 2025 y.

Toshkent shahri

“MAAB Innovation” MChJ (keyingi o‘rinlarda “**Jamiyat**”) nomidan Ustavga asosan faoliyat yurituvchi direktor D.B.Kasimov bir tomondan va ikkinchi tomondan \_\_\_\_\_ (keyingi o‘rinlarda “**Talaba**” deb nomlanadi) yoki tahsil oluvchi sifatida voyaga yetmagan shaxs manfaatlari yuzasidan harakat qilayotgan shaxs-vakil (“**Talaba**”ning otasi, onasi/qonuniy vakili) \_\_\_\_\_, birgalikda “Taraflar” deb ataluvchilar quyidagi mazmunda ushbu shartnomani tuzdilar.

### 1. ASOSIY TUSHUNCHALAR

Ushbu shartnomada quyidagi asosiy tushunchalar mavjud:

**Mutaxassislik** – Axborot texnologiya va kommunikatsiyalari sohasining ma’lum bir yo‘nalishi bo‘yicha ishlash uchun talab etiladigan bilimlar jamlanmasi – kvalifikatsiya. Mutaxassislik bo‘yicha bilimlar bir yoki bir nechta o‘quv dasturlari kesimida bo‘ladi.

**O‘quv dasturi** – Axborot texnologiyalari sohasidagi “**MAAB Innovation**” (keyingi o‘rinlarda **Jamiyat**) tomonidan *Business Intelligence* (ma’lumotlar bazasi tahlili) va *Artificial Intelligence* (Sun’iy intellekt) yo‘nalishi bo‘yicha maxsus ishlab chiqilgan bilim va ko‘nikmalar majmui. O‘quv dasturiga tegishli darslar modul (oy)lar kesimida bo‘ladi. Ushbu o‘quv dasturi va uning tarkibiy qismlari Jamiyatning bevosita intellektual mulki hisoblanib, mazkur shartnoma, lokal hujjatlar va tartibga soluvchi tegishli qonunlar bilan himoya qilinadi.

**Shaxsga doir ma’lumotlar** – Mazkur Shartnomaning imzolanishi bilan Talaba/uning vakili O‘zbekiston Respublikasining “Shaxsga doir ma’lumotlar to‘g‘risida”gi qonuni va boshqa bir qator normativ hujjatlarga asosan Jamiyat tomonidan o‘zining shaxsiga doir ma’lumotlariga ishlov berilishiga o‘z roziligini beradi.

**Dastlabki saralash** – Jamiyat va/yoki uchinchi Tomon ishtirokida tashkil qilingan va ular tomonidan belgilangan bir qator mezonlar asosida tegishli vaqt oralig‘ida amalga oshiriladigan saralash. Saralash natijasida tanlab olingan nomzodlar Telegram ijtimoiy tarmog‘ida ochilgan maxsus guruhda jamlangan holda Jamiyat tomonidan tashkil qilingan mazkur o‘quv dasturi bo‘yicha tahsil olishni boshlashadi. Ushbu saralashdan muvaffaqiyatli o‘tgan shaxs Jamiyat tomonidan tegishli tartibda xabardor qilinadi.

**Oraliq nazorati** – har bir modul(oylar) yakunida yoki Jamiyat tomonidan belgilangan vaqtda bepul tarzda o‘tkaziladigan sinov bo‘lib, undan muvaffaqiyatli o‘tgan Talaba keyingi bosqichga o‘tadi. Ushbu oraliq nazoratidan yiqilgan, qoniqarsiz natija ko‘rsatgan Talaba o‘quv dasturidan chetlashtiriladi va Jamiyat tomonidan o‘qitilgan modul(lar) uchun Jamiyat oldida hech qanday tarzda qarzdor bo‘lmaydi. Nazoratlar Jamiyat tomonidan bepul tarzda amalga oshiriladi.

**Yakuniy imtihon** – O‘quv dasturining barcha modullarini yakunlagan Talaba topshiradigan sinov bo‘lib, muvaffaqiyatli o‘tilganida tegishli mutaxassislik bo‘yicha tahsil olganligini tasdiqlovchi sertifikat bilan taqdirlaniladi. Yakuniy imtihondan yiqilgan, qoniqarsiz natija ko‘rsatgan Talabaga yana bir bor imkoniyar beriladi. Mazkur imtihon Jamiyat tomonidan bepul tarzda amalga oshiriladi.

**Talaba** – fuqaro \_\_\_\_\_ ushbu shartnomaga ko‘ra haq evaziga ta’lim xizmatini oluvchi jismoniy shaxs. Voyaga yetmagan shaxs ota-onasi yoki uning o‘rnini bosuvchi vasiy, homiy yohud boshqa shaxs (keyingi o‘rinlarda ota-

ona) nazoratida Talaba bo'lishi mumkin. Bunda Jamiyat xizmatlari uchun pul to'lash masalasi o'ta-onalar zimmasiga yuklatiladi. Ushbu majburiyat bajarilmaganligi oqibatida kelib chiqadigan nizolar bo'yicha Jamiyat javobgar bo'lishi mumkin emas.

## 2. SHARTNOMA PREDMETI

- 2.1. Mazkur shartnomaga muvofiq Jamiyat Talabaga *Business Intelligence* (ma'lumotlar bazasi tahlili) va *Artificial Intelligence* (Sun'iy intellekt) yo'nalishlarining **tegishli** mutaxassisliklari bo'yicha o'quv dasturi shaklida haq evaziga ta'lim xizmatini (keyingi o'rinlarda Xizmatlar) taqdim etadi, Talaba esa ta'lim olganligi uchun shartnomada belgilangan miqdorda va tartibda to'lovni amalga oshiradi;
- 2.2. Ta'lim dasturi dastlab *Business Intelligence* (ma'lumotlar bazasi tahlili) bosqichi, keyinchalik *Artificial Intelligence* (Sun'iy intellekt) bo'yicha olib boriladi;
- 2.3. Jamiyat Talabaga ta'lim xizmatini shaxsan (xodimlari orqali) yoki kerak bo'lganda tegishli uchinchi shaxslarni jalb qilgan holda xizmatlarni taqdim etishga haqli;
- 2.4. O'quv dasturining birinchi moduli Talaba uchun sinov davri bo'lib, ushbu davrda o'qishdan chetlashish sababidan qat'iy nazar Talabada Jamiyatga nisbatan hech qanday qarzdorlik vujudga kelmaydi;
- 2.5. Birinchi moduldan keyin o'quv dasturining yakuniga qadar o'z xohishiga ko'ra o'qishdan/guruhdan chiqib ketgan Talaba mazkur shartnomaning ajralmas qismi hisoblangan 1-Ilovada aks ettirilgan unga o'qitilgan modul(lar)ning qiymatini **3 (uch)** oylik vaqt oralig'ida Jamiyatga to'liq miqdorda to'lab berishi shart. Bunda, mazkur shartnomani 18 (o'n sakkiz) yoshga to'lmagan Talaba nomidan imzolagan uning vakili Talabaning Jamiyatga to'lanmay qolgan barcha qarzdorligi bo'yicha solidar (teng) javobgar bo'ladi. Bu bosqich(lar)da Jamiyat tomonidan o'qishdan/guruhdan chetlashtirilgan Talaba Jamiyat oldida hech qanday tarzda qarzdor hisoblanmaydi. 18 yoshga to'lgan Talabada vakil bo'lmaydi;
- 2.6. O'quv dasturi oxirida yakuniy imtihondan yiqilgan, qoniqarsiz natija ko'rsatgan Talaba yana bir bor imkoniyat beriladi;
- 2.7. Jamiyat, o'quv dasturini muvaffaqiyatli yakunlagan Talabani o'ziga ishga olish yoki uni o'quv dasturidagi yo'nalish bo'yicha ishga joylashtirish majburiyatini o'z zimmasiga olmaydi, lekin o'z imkoniyatlari doirasi hamda darajasida mazkur masalada Talabaga ko'maklashadi;
- 2.8. Talabada bir vaqtning o'zida Jamiyat va boshqa ish beruvchidan ish taklifi mavjud bo'lsa u o'zining xohish-istagi bo'yicha mazkur takliflardan birini qabul qilish yoki hech birini qabul qilmaslik huquqiga egadir. Jamiyatning ish taklifini qabul qilgan Talaba bilan **2 (ikki)** yilgacha mo'ljallangan mehnat shartnomasi yoki fuqarolik huquqiy tisdagi mehnat haqidagi kelishuv imzolanishi mumkin. Talabaning Jamiyatda ishlagan davri o'quv dasturi barcha modullarining narxiga teskari proporsional bo'lib, Jamiyatda 24 (yigirma to'rt) oy ishlagan Talaba Jamiyatga qarzdor hisoblanmaydi;
- 2.9. Agar Talaba o'quv dasturidagi yo'nalish bo'yicha boshqa ish beruvchining taklifini qabul qilgan holda mehnat faoliyatini boshlasa u barcha modullar uchun shartnomaning 1-Ilovasida aks ettirilgan summani **5 (besh)** oylik vaqt oralig'ida Jamiyatga to'liq miqdorda to'lab beradi;
- 2.10. Agar Talaba o'quv dasturidagi yo'nalishdan boshqa, undan farqli bo'lgan har qanday mehnat faoliyati bilan shug'ullansa u Jamiyatga qarzdor hisoblanmaydi;
- 2.11. Jamiyatda o'quv dasturini muvaffaqiyatli yakunlagan Talabani ishga qabul qilish imkoniyati bo'lmasa, Talabaga mazkur yo'nalish bo'yicha ishga joylashish uchun imtiyozli 2 (ikki) oylik muddat beriladi. Bunda, agar Talaba mazkur ikki oylik muddat ichida atayin o'quv dasturi yo'nalishi bo'yicha ishga joylashmasa **5 (besh)** oy davr mobaynida ta'lim xizmati to'lovini

to'lashi lozim. Shuningdek, Talaba o'z imkoniyati doirasida ishga joylashish uchun amalga oshirgan harakatlari unga bog'liq bo'lmagan holda samarasiz yakunlanganligini hujjatlar asosida isbotlab bersa Jamiyat ushbu muddatni uzaytirib berishi mumkin.

### 3. TO'LOV MIQDORI, SHARTLARI VA TARTIBI

- 3.1. *BI and AI Talents* o'quv dasturining narxi **1 (bir) so'mni** tashkil qiladi;
- 3.2. Ta'lim xizmati haq evaziga va to'lovni oldindan to'liq miqdorda Jamiyatning hisob-raqamiga amalga oshirish shartlarida taqdim qilinadi. Bunda to'lov modul darsi boshlanmasdan oldin to'liq miqdorda amalga oshirilishi kerak;
- 3.3. Xizmat ko'rsatish to'lov amalga oshirgan Talabalar guruhi shakllanganidan so'ng boshlanadi;
- 3.4. Talaba tomonidan mazkur o'quv dasturi bo'yicha Jamiyatga to'lab berilgan to'lov(lar) Jamiyat tomonidan qaytarilmaydi;
- 3.5. Jamiyat tomonidan belgilangan muddatda guruh shakllantirilmaganda yoki xizmat ko'rsatish to'xtatilganda, Talaba tomonidan to'langan 1 (bir) so'mlik to'lovni qaytarish Talaba yozma ravishda ariza bergan sanadan boshlab **3 (uch) bank ish kuni** ichida amalga oshiriladi.

### 4. TA'LIM JARAYONI

- 4.1. O'quv dasturi *BI and AI Talents* deb nomlanadi. Dasturning dastlabki bosqichi *Business Intelligence* hisoblanib, uni muvaffaqiyatli tugatgan Talaba *Artificial Intelligence* bo'yicha o'qishini davom qilishi mumkin;
- 4.2. O'quv dasturining davomiyligi *ikkita* bosqichdan iborat bo'lib, barcha modullarni hisobga olganda **14 (o'n to'rt)** oyni tashkil qiladi;
- 4.3. O'quv dasturini boshlamoqchi bo'lgan nomzod Jamiyat va/yoki uchinchi Tomon ishtirokida tashkil qilingan va ular tomonidan belgilangan bir qator mezonlar asosida tegishli vaqt oralig'ida amalga oshiriladigan *Dastlabki saralashdan* o'tishi shart. Ushbu saralashdan muvaffaqiyatli o'tgan nomzod *BI and AI Talents* o'quv dasturi bo'yicha o'qish imkoniyatiga ega bo'ladi;
- 4.4. Talaba Jamiyat tomonidan belgilangan minimal mezon/talablarga javob beradigan notebook/kompyuterga ega bo'lishi va ushbu notebook/kompyuter bilan darslarga qatnashishi lozim. Bunda Jamiyat Talabani bunday notebook/kompyuter bilan ta'minlash majburiyatini o'z zimmasiga olmaydi;
- 4.5. O'qish davomida kurs materiallarini o'zlashtirish holatini baholash maqsadida Talabalarga o'quv rejasiga ko'ra oraliq nazorati, shuningdek o'quv dasturi yakuniga ko'ra yakuniy imtihon o'tkaziladi;
- 4.6. Xizmatlar Jamiyat tomonidan maxsus ishlab chiqilgan rejaga muvofiq amalga oshiriladi;
- 4.7. Jamiyat Talabaga *BI and AI Talents* o'quv dasturi bo'yicha 14 oygacha bo'lgan muddat mobaynida haq evaziga onlayn (maxsus Telegram kanali orqali) va/yoki offlayn tarzda ta'lim xizmatlarini ko'rsatadi. O'z navbatida Talaba o'tilgan darslarni Jamiyat tomonidan belgilangan darajadan past bo'lmagan saviyada o'zlashtirish majburiyatini oladi;
- 4.8. Ta'lim jarayoni boshlang'ich, o'rta, o'rta-maxsus, oliy yoki oliy ta'limdan keyingi ta'lim hisoblanmaydi va tegishli dasturlarga muvofiq bo'lishi talab etilmaydi;
- 4.9. Talaba o'qishdan quyidagi hollarda chetlashtirilishi mumkin:
  - 4.9.1. O'z xohishiga binoan;
  - 4.9.2. Oraliq nazorati va yakuniy imtihonlardan qoniqarsiz natija ko'rsatsa;
  - 4.9.3. O'quv intizomini hamda odob-axloq qoidalarini buzsa;

- 4.9.4. Modul kesimida uzrli sabablarsiz **6 (olti)** soatdan ortiq dars qoldirsa;
- 4.10. Ta'lim jarayoni mobaynida harbiy xizmatni o'tash, salomatligini tiklash, homiladorlik va tug'ish, shuningdek bolalarni parvarish qilish ta'tillari davrida hamda oilasining betob a'zosini parvarish qilish uchun Talabaga ta'til berilmaydi;
- 4.11. Talabaning aybli harakati (4.9.1 – 4.9.4 bandlari bilan cheklanib qolmasdan) sababli Talabalar safidan chetlashtirish Jamiyatning mutloq huquqi hisoblanib, bunda mazkur harakatlarni Jamiyat ma'muriyati boshqa organlar bilan kelishishga majbur emas;
- 4.12. Jamiyat ta'lim xizmati jarayonini mustaqil ravishda amalga oshirish, ta'lim dasturi, uning davomiyligi va mashg'ulotlar jadvalini tuzish yoki o'zgartirish, darslar boshlanishidan oldin va davomida Talabalar safi hamda sonini belgilash va o'zgartirish, shuningdek nomzod/Talabaning dastlabki saralash, oraliq nazorati va yakuniy imtihon o'tkazish tartibini belgilash va o'zgartirishga haqli;
- 4.13. Talabaga yakuniy imtihondan o'tish uchun berilgan imkoniyat(lar) muvaffaqiyatsiz bo'lsa-da, ta'lim xizmatlari ko'rsatilgan va shartnoma bajarilgan hisoblanadi. Bunda mazkur Talaba barcha modullar uchun ushbu shartnomaning 1-Ilovasida aks ettirilgan summani **5 (besh)** oy davomida to'lab berishi shart;
- 4.14. Talaba ta'lim dasturini o'zlashtirib, yakuniy imtihondan muvaffaqiyatli o'tganidan so'ng unga tegishli mutaxassislik bo'yicha tahsil olganligi to'g'risida sertifikat beriladi;
- 4.15. Agar Talaba yakuniy imtihonda ishtirok etmasa yoki qoniqarsiz natija ko'rsatsa yohud o'quv dasturining bir qismini o'zlashtirgan bo'lsa unga o'quv dasturining tegishli qismini tinglaganligi haqida ma'lumotnoma berilishi mumkin.

## **5. JAMIYATNING HUQUQ VA MAJBURIYATLARI**

### **5.1. Jamiyatning huquqlari:**

- 5.1.1. Talaba uchun majburiy bo'lgan buyruq va ko'rsatmalar berish;
- 5.1.2. Talaba va/yoki uning vakili tomonidan mazkur shartnoma bo'yicha o'z zimmlariga olgan majburiyatlar bajarilishi yuzasidan doimiy nazoratni olib borish;
- 5.1.3. O'zi xohlagan payti har qanday Talabani talabalar safidan chiqarish va u bilan shartnomani bekor qilish;
- 5.1.4. Jamiyat tomonidan tashkil qilingan oraliq nazoratlari va yakuniy imtihondan yiqilgan, qoniqarsiz natija ko'rsatgan Talabaga saralash bo'yicha xabar berish;
- 5.1.5. Talaba guruhlariga Jamiyat imkoniyatlaridan kelib chiqqan holda o'qituvchi biriktirish. Bunda, o'qish dasturining davomiyligiga ta'sir ko'rsatmagan holda o'qituvchilar tarkibiga o'zgartirish kiritish;
- 5.1.6. Qog'oz, dastur va/yoki elektron shakldagi o'quv dasturlar hamda mualliflik huquqi asosidagi qo'llanma-namunalarga intellektual mulk obyekti sifatida mulkiy huquq bo'yicha egalik qilish;
- 5.1.7. Agar darslar uchun to'lovlar o'z vaqtida to'lanmagan bo'lsa, Talabani darslarga kiritmaslik;
- 5.1.8. Talabalarning bilimlarini turli imtihon va masala (keys)lar orqali muntazam ravishda hisobga olish va nazorat qilish. Voyaga yetmagan Talaba ota-onalarining talabi bo'yicha ularni Talabaning imtihon natijalari bilan tanishtirish;
- 5.1.9. Dastlabki saralash, oraliq nazoratlari va yakuniy imtihon shakli, tartibi, davomiyligi hamda ularni baholash mezonlarini mustaqil shaklda tanlash, o'quv dasturi davomida ularga xohlagan tarzda o'zgartirish va qo'shimchalar kiritish;
- 5.1.10. Talabalarga yetkazilgan e'lonlar orqalari darslar jadvalini bir tomonlama o'zgartirish;

5.1.11. Talaba tomonidan mazkur shartnomada va amaldagi qonun-hujjatlarda belgilangan majburiyatlarning bajarilmasligi yoki lozim darajada bajarilmasligi Jamiyat tomonidan qonunda va ushbu shartnoma qoidalarida belgilangan tartibda tegishli choralarni ko‘rish huquqini vujudga keltiradi;

5.1.12. Jamiyat tomonidan o‘rnatilgan ichki tartib-qoidalarga rioya qilmagan Talabani tartibga chaqirish, Talabalar safidan chiqarish va shartnomani bekor qilish;

5.1.13. Talaba tomonidan mazkur qoidalarda belgilangan majburiyatlarning qo‘pol ravishda buzilishi yoki o‘quv dasturini olib borish jarayonida boshqa qonunbuzarliklar aniqlangan taqdirda tegishli huquqni muhofaza qiluvchi organlarga murojaat qilish;

5.1.14. O‘zbekiston Respublikasi rasmiy bayramlari, ta’tillar va shunga o‘xshash sabablar bo‘yicha darslarni vaqtincha to‘xtatib turish huquqini saqlab qolish. Bunday holda, o‘tilmagan darslarning vaqti Talaba bilan kelishilgan holda o‘tiladi;

5.1.15. Yakuniy imtihondan muvaffaqiyatli o‘ta olmagan Talaba(lar) uchun tegishli mutaxassislik bo‘yicha tahsil olganligi bo‘yicha sertifikat emas, balki o‘quv dasturini tinglaganligi haqida ma’lumotnoma berish.

5.1.16. Ushbu shartnomada qayd etilgan huquqlardan tashqari, Jamiyat lokal(ichki) hujjatlari va tartibga soluvchi qonunda belgilangan boshqa huquqlar.

## **5.2. Jamiyatning majburiyatlari:**

5.2.1. Talabani *Business Intelligence* va *Artificial Intelligence* yo‘nalishlari bo‘yicha mazkur o‘quv dasturi doirasida ta’lim olish uchun zarur bo‘ladigan o‘quv materiallari bilan ta’minlashmash va ta’lim berish;

5.2.2. Shartnomada nazarda tutilgan ta’lim xizmatlarini o‘z vaqtida, to‘g‘ri ko‘rsatishni ta’minlash;

5.2.3. O‘quv dasturini lozim darajada o‘zlashtirgan malakali mutaxassislar ishtirokida ta’lim xizmatlarini ko‘rsatish;

5.2.4. Ta’lim xizmatlari ko‘rsatilish jarayoniga mas’uliyat bilan yondashish;

5.2.5. Talaba yoki uning nomidan murojaat qiladigan vakil(lar)ga hurmat bilan munosabatda bo‘lish;

5.2.6. Ta’lim xizmatlarini Jamiyat tomonidan dars jadvalida belgilangan soatlarda ko‘rsatilishini ta’minlash;

5.2.7. Talaba tomonidan dars(lar)ga uzrli sabab(lar) bo‘yicha qatnashmaganligini tasdiqlovchi hujjat(lar) taqdim qilinganda mazkur holatni uning davomatida aks ettirish.

## **6. TALABANING HUQUQ VA MAJBURIYATLARI**

### **6.1. Talaba huquqlari:**

6.1.1. O‘quv xonalari va laboratoriya jihozlaridan tegishli dars jadvaliga ko‘ra bepul foydalanish;

6.1.2. Jamiyat hududida joylashgan kutubxona va u yerdagi o‘quv materiallaridan bepul foydalanish;

6.1.3. Bepul maslahatlar va yo‘l-yo‘riqlar olish hamda sinflar, ta’lim jarayoniga oid vositalardan o‘rnatilgan tartibda foydalanish;

6.1.4. Ta’lim jarayoni samaradorligi va ta’lim sifatini oshirish yuzasidan o‘z taklif-mulohazalarini, tanqidiy fikrlarini belgilangan tartibda Jamiyat ma’muriyatiga bildirish va ularni ko‘rib chiqilishini talab qilish;

6.1.5. Ta’lim jarayonida “co-working” hududlaridan 7.1.1 bandda ko‘rsatilgan tartibda imtiyozli ravishda foydalanish;

- 6.1.6. Jamiyatda o'tkaziladigan ommaviy tadbirlarda ishtirok etish;
- 6.1.7. Agar o'qitish jarayonida Jamiyatning aybi bilan bir yoki bir nechta mashg'ulotlar bekor qilingan bo'lsa, ushbu mashg'ulotlarni o'tkazishni talab qilish;
- 6.1.8. Talaba uzrli sabablarga ko'ra qoldirgan darslari uchun ushbu darajadagi boshqa guruhlarda qo'shimcha darslar olish. Bunda Jamiyat qo'shimcha darslarning aniq jadvalini o'z imkoniyatlaridan kelib chiqqan holda belgilaydi;
- 6.1.9. Talabaning xohishiga ko'ra yoki Jamiyatning imkoniyati cheklanganligi sababli 6.1.8 badda ko'rsatilgan huquqdan foydalanishning imkoniyati bo'lmagan taqdirda qoldirilgan darslarni videodarslar orqali o'zlashtirib olish;
- 6.1.10. Uzrli sabablarga ko'ra surunkali dars qoldirish ehtiyoji paydo bo'lganda darslarni vaqtincha muzlatib turish talabi bilan Jamiyatga murojaat qilish. Bunda, Jamiyat holatni o'rganib murojaatni qondirish yoki uni rad etishi mumkin.

## **6.2. Talaba majburiyatlari:**

- 6.2.1. Jamiyatning pedagogik jamoasi tomonidan berilgan darslar bo'yicha topshiriqlarni, uyga vazifalarni, amaliy vazifalarni, amaliyot ishlarini to'liq va o'z vaqtida bajarish;
- 6.2.2. Mazkur shartnoma bo'yicha Talabaning zimmasiga yuklatilgan va/yoki yuklatiladigan majburiyatlarni o'z vaqtida hamda to'liq hajm va miqdorda bajarish;
- 6.2.3. Umumiy qabul qilingan xulq-atvor normalariga, shuningdek ichki tartib qoidalari, sanitariya va xavfsizlik talablariga hamda boshqa lokal hujjatlari talablariga rioya etish;
- 6.2.4. Jamiyatga o'zining shaxsiga oid hujjatlar nusxalari, shuningdek o'rta maxsus kasb-hunar yoki oliy ta'lim bo'yicha hujjatlarini taqdim etishi;
- 6.2.5. Talabaga ko'rsatilayotgan xizmatlarga mas'uliyat bilan yondashish;
- 6.2.6. Jamiyatning pedagogik, texnik va boshqa xodimlariga hurmatda bo'lish;
- 6.2.7. O'qitish olib boriladigan binoda o'quv dasturi yoki darslarga ta'alluqli bo'lmagan videolar, turli xil rasmlarni tomosha qilish, o'yin o'ynash kabi harakatlarni amalga oshirmaslik;
- 6.2.8. Talaba Jamiyatda o'qigan mutaxassisligi bo'yicha olgan bilim hamda ko'nikmalarini mazkur shartnoma kuchga kirgan kundan boshlab 5 (besh) yil davomida boshqa shaxslarga bevosita yoki bilvosita, online yoki offline tarz va shaklda, foyda olishi yoki olmasligidan qat'i nazar ta'lim bermaslik va Jamiyatda olgan bilimlarini Jamiyatdan tashqarida o'rgatmaslik majburiyatini o'z zimmasiga oladi. Mazkur majburiyat Talaba tomonidan bajarilmagan va boshqa shaxslarga Jamiyatda o'qitilgan mutaxassisligi yo'nalishida har qanday bilim va ko'nikmalar bo'yicha ta'lim bergan va Jamiyatning intellektual mulki hamda o'qitish uslubini Jamiyatdan tashqarida uchinchi shaxslarga bevosita yoki bilvosita oshkor qilgan yoki o'qitgan taqdirda Jamiyatga yetkazilgan zarar uchun bazaviy hisoblash miqdori (BHM)ning 2000 (ikki ming) barobari miqdorida jarima to'laydi. Bunda to'langan jarima ushbu shaxsga Jamiyatda olgan bilim va ko'nikmalarini Jamiyatdan tashqaridagi boshqa shaxslarga o'rgatish huquqini bermaydi;
- 6.2.9. Jamiyatni darsga qatnashmaganlikning asosli sabablari haqida xabardor qilish va ketma-ket 3 (uch) martadan ko'p dars qoldirilganda sabab(lar)ni tasdiqlovchi hujjatni o'z vaqtida taqdim etish;
- 6.2.10. O'quv dasturi olib borilayotgan xona va bino mol-mulkiga g'amxo'rlik qilish va Jamiyat mulkiga yetkazilgan moddiy zararni to'liq qoplash;
- 6.2.11. O'quv dasturi olib borilayotgan bino hududiga mast qiluvchi mahsulotni iste'mol qilgan holda kelmaslik, bino hududi va uning atrofida tamaki hamda nos mahsulotlarini chekmaslik;
- 6.2.12. Jamiyatning ichki tartib qoidalariga rioya qilish, dars vaqtida mobil aloqa vositalaridan foydalanmaslik;

6.2.13. Jamiyat tomonidan belgilangan minimal mezon/talablarga javob beradigan notebook/laptopga ega bo'lishi va ushbu notebook/laptop bilan darslarga qatnashish. Bunda Jamiyat Talabani bunday notebook/laptop bilan ta'minlash majburiyatini o'z zimmasiga olmaydi.

## **7. TALABAGA TAQDIM ETILADIGAN QO'SHIMCHA IMTIYOZLAR**

7.1. Talabaga quyidagi qo'shimcha imtiyozlar taqdim qilinadi:

7.1.1. Talabaga ta'lim xizmatlari ko'rsatiladigan hududda joylashgan "co-working" hududida bir kishilik o'rinni har kuni 3 (uch) soatgacha band qilish imkoniyati berilishi mumkin;

7.1.2. Shuningdek, Jamiyat tomonidan Akademiya hududida Talabaga bepul Internet taqdim qilish;

7.1.3. Jamiyat binosida sun'iy intellekt laboratoriyasi tashkil qilingan taqdirda mazkur o'quv dasturi mobaynida o'rgangan nazariy bilim va ko'nikmalarini ushbu laboratoriyada amaliyotda tatbiq qilish.

## **8. SHARTNOMANING MUDDATI, UNI O'ZGARTIRISH VA BEKOR QILISH ASOSLARI HAMDA TARTIBI**

8.1. Ushbu shartnoma imzolangan kundan boshlab kuchga kiradi va Taraflar shartnoma bo'yicha o'z majburiyatlarini to'liq bajarguniga qadar yoki Taraflarning o'zaro kelishuvi bilan muddatidan avval tugatilguncha amal qiladi;

8.2. Ushbu shartnoma shartlari Taraflarning o'zaro kelishuvi bilan o'zgartirilishi mumkin;

8.3. Ushbu shartnoma Talabaning (voyaga yetmagan taqdirda uning vakili) iltimosiga binoan muddatidan oldin bekor qilinishi mumkin. Bu haqida Talaba shartnoma bekor qilinishi kutilayotgan sanadan avval 7 (yetti) ish kunidan kechiktirmasdan yoki yangi o'quv moduli (oyi) boshlanishidan avval yozma ravishda Jamiyatga xabar berishi lozim;

8.4. Ushbu shartnoma Jamiyatning tashabbusi bilan quyidagi hollarda bir tomonlama bekor qilinishi mumkin:

8.4.1. Talaba tomonidan to'lovni o'quv moduli (oyi)ning 2-darsigacha kechiktirilishi;

8.4.2. Talabaning shartnoma **6.2.1, 6.2.6, 6.2.12** bandlaridagi harakatlari (yoki harakatsizligi) natijasida Jamiyatning ta'lim xizmatlarini ko'rsatish bo'yicha majburiyatlarini to'g'ri bajara olmasligi;

8.4.3. Talaba tomonidan shartnomaning **6.2.11.** bandi qoidalarining takroran buzilishi;

8.4.4. Mazkur shartnomaning 5.1.3-bandiga muvofiq;

8.5. Talabaning tashabbusi bilan shartnomani bekor qilishga faqat yangi o'quv moduli (oyi) boshlanishidan avval yo'l qo'yiladi;

8.6. Taraflar mazkur shartnomada, Jamiyat lokal hujjatlarida belgilangan tartibda va asoslarda ushbu shartnomani muddatidan oldin bekor qilish huquqiga ega.

## **9. TARAFLARNING JAVOBGARLIGI**

9.1. Shartnoma bo'yicha o'z majburiyatlarini bajarmaganlik yoki lozim darajada bajarmaganlik uchun Taraflar shartnoma va O'zbekiston Respublikasi qonunchiligi bo'yicha javobgar bo'ladilar;

9.2. Jamiyat quyidagilar uchun javobgar bo'lmaydi:

9.2.1. Talabaning unga ko'rsatilgan ta'lim xizmatlaridan maqsadsiz, qonun va mazkur qoidalar talablariga zid ravishda foydalanishi natijasida uchinchi shaxslar oldida yuzaga keladigan majburiyatlar, shu jumladan har qanday zarar;

9.2.2. Jamiyatga bog'liq bo'lmagan sabablarga ko'ra xizmatlar sifatining yomonlashishi, kechikishi, tizimdagi uzilishlar, shuningdek to'lov tizimlari faoliyatidagi nuqsonlar.

9.3. Har qanday holatda, ushbu oferta qoidalaridan kelib chiqadigan yoki uning bajarilishi munosabati bilan Jamiyat javobgarligining hajmi O'zbekiston Respublikasida belgilangan Bazaviy hisoblash miqdorining 50 (ellik) baravaridan oshmasligi kerak;

9.4. Mazkur qoidalar va qonunda belgilangan jarimalarning to'lanishi ikkinchi Tarafga yetkazilgan zararni qoplash bo'yicha majburiyatdan ozod qilmaydi.

## **10. FORS-MAJOR**

10.1. Taraflar mazkur shartnoma bo'yicha majburiyatlarni bajarmaganligi yoki lozim darajada bajarmaganligi uchun, agar bunday vaziyat ushbu shartnoma tuzilgandan keyin Taraflar oldindan bilishi va uning oldini olishi mumkin bo'lmagan favqulodda xususiyatga ega voqealar natijasida vujudga kelgan yengib bo'lmaydigan kuch (fors-major holatlari) tufayli yuzaga kelganligini va Taraflar o'z majburiyatlarini lozim darajada bajarish yuzasidan barcha mumkin bo'lgan va o'zlariga bog'liq bo'lgan choralarni ko'rganligini isbotlasa, javob bermaydi;

10.2. Quyidagilar fors-major holatlarga kiradi: urush holati va harbiy harakatlar, davlat organlari tomonidan e'lon qilingan favqulodda holat rejimi, epidemiya, zilzila, yong'in, toshqin va boshqa tabiiy ofatlar ta'siri, davlat organlarining qarorlari va boshqa ta'qiqlovchi qarorlar;

10.3. Mazkur shartnoma bo'yicha majburiyatlarni bajarish imkonsizligi yuzaga kelgan Taraf yuqoridagi holatlarning paydo bo'lishi, kutilayotgan davomiyligi va bekor qilinishi to'g'risida boshqa Tarafga 5 (besh) kun ichida xabar beradi;

10.4. Agar ko'rsatilgan holatlar va ularning oqibatlari ketma-ket bir oydan ko'proq vaqt davom etadigan bo'lsa, Taraflar xizmat ko'rsatishning Online (masofaviy) rejimiga o'tadilar yoki mazkur shartnomani bajarish yoki uni bekor qilishning muqobil usullarini aniqlash uchun qo'shimcha muzokaralar o'tkazadilar. Agar majburiyatlarni to'liq yoki qisman bajarish imkonsizligi ikki oydan ko'proq vaqt mobaynida mavjud bo'lsa, Jamiyat Talabaning mumkin bo'lgan zararlarini (shu jumladan, xarajatlarini) qoplash majburiyatini olmasdan shartnomani to'liq yoki qisman bekor qilishga haqlidir.

## **11. YAKUNIY QOIDALAR**

11.1. Xizmatlar tugaganidan so'ng, ko'rsatilgan xizmatlar to'g'risida dalolatnoma tuzilmaydi yoki imzolanmaydi hamda qabul qilish aktlari ham imzolanmasdan amalga oshiriladi. Oxirgi ta'lim xizmati tugaganidan keyin 7 (yetti) ish kuni ichida Talaba (voyaga yetmagan taqdirda uning vakili) tomonidan ta'lim xizmati sifati haqida yozma shaklda e'tiroz bildirilmagan bo'lsa, Jamiyat tomonidan xizmatlar to'g'ri va to'liq taqdim etilgan deb hisoblanadi;

11.2. Ushbu shartnoma kuchga kirgan kundan boshlab Taraflar o'rtasida mazkur shartnoma yoki shunga o'xshash narsalar to'g'risidagi har qanday kelishuv va bitimlar o'z kuchini yo'qotadi;

11.3. Jamiyat ma'muriyati tomonidan qabul qilingan (shu jumladan, shartnoma imzolanganidan keyin qabul qilinadigan va o'zgartiriladigan) ichki tartib qoidalar, odob-ahloq qoidalar va boshqa lokal hujjatlar mazkur shartnomaning muhim shartlari va ajralmas qismi hisoblanadi;

11.4. Ushbu shartnoma alohida qoidalar (qismlari)ning bekor qilinishi yoki haqiqiy emasligi shartnomaning boshqa qoidalar (qismlari)ning haqiqiy emasligiga sabab bo'lmaydi;

11.5. Ushbu shartnoma bo'yicha Tarafning huquq va majburiyatlarini uchinchi shaxslarga o'tishiga boshqa Tarafning yozma roziligi bilan yo'l qo'yiladi, ushbu shartnomaning 2.3-bandi bundan mustasno;

11.6. Taraflarning mazkur shartnoma bilan tartibga solinmagan munosabatlari O'zbekiston Respublikasi qonunlari bilan tartibga solinadi;



11.7. Shartnomaning barcha ilovalari va qo‘shimcha bitimlar mazkur shartnomaning ajralmas qismidir;

11.8. Shartnoma teng yuridik kuchli 2 (ikki) nusxada, har bir Taraf uchun bittadan nusxada tuzildi.

#### TARAFLARNING MANZILLARI VA REKVIZITLARI

<b>“Jamiyat”:</b> “MAAB Innovation” MCHJ	<b>“Talaba”:</b> _____ _____
<b>Manzil:</b> O‘zbekiston Respublikasi, Toshkent shahri, Yashnobod tumani, Do‘stobod MFY, Maxtumquli ko‘chasi, 178/1 - uy	<b>Manzil:</b> _____ _____ _____ <b>Pasport seriyasi, qachon va kim tomonidan berilgan</b> _____ _____
H/R: 20208000905108359002	<b>Tel / e-mail:</b> _____ _____
MFO: 00491, STIR: 306622749 "Trastbank" XAB Amaliyot Boshqarmasi	<b>Otasining F.I.SH</b> _____ _____ <b>Tel / e-mail:</b> _____ <b>Onasining F.I.SH</b> _____ _____ <b>Tel / e-mail:</b> _____
Direktor _____ Kasimov D.B.	

Shartnoma bilan tanishib chiqdim, bir nusxasini o‘zimga oldim.

Shartnoma shartlarini to‘liqligicha

qabul qildim hamda shaxsimga doir

ma’lumotlarga ishlov berilishiga roziman

\_\_\_\_\_  
(imzo)

\_\_\_\_\_  
(F.I.SH)

Business Intelligence (BI) va Artificial Intelligence (AI) bo'yicha o'rgatiladigan dasturlash tillari va texnologiyalar	Darslar haftasiga 3 (uch) marta hamda davomiyligi ikki soatgacha o'tiladi	Oy/modul	Modul narxi*	
			Bir oyga	Jami
Python		1,5 oy	0	0
SQL		1,5 oy	800 000	1 200 000
Power BI		1,5 oy	800 000	1 200 000
ETL (SSIS)		1,5 oy	800 000	1 200 000
Machine Learning (ML)		4 oy	800 000	3 200 000
Deep Learning (DP)		4 oy	800 000	3 200 000
O'quv dasturi umumiy muddati va narxi**		14		10 000 000

\* Dastur mobaynida oraliq nazorati yoki yakuniy imtihonlardan o'ta olmagan, o'z xohishi yoki Jamiyatning qaroriga binoan oqish/guruhdan chetlatilgan Talaba unga ta'lim berilgan modul(lar) uchun tegishli to'lovni uch oydan besh oygacha bo'lgan davr oralig'ida to'liq miqdorda amalga oshirishi shart.

\*\* Zamon, mehnat bozori va Talabaning ehtiyoj va talablaridan kelib chiqqan holda dasturlash tillari va texnologiyalar ro'yxatiga ushbu Shartnomaning ajralmas qismi bo'ladigan qo'shimcha bitim imzolanishi orqali tegishli o'zgartirishlar kiritilishi mumkin.